

四庫全書

集部

欽定四庫全書

集部

兩宋名賢小集卷二百八十五

詳校官中書臣閔思毅

助教臣常循履勘

總校官編修臣王燕緒

校對官編修臣曹錫齡

謄錄監生臣吳克成

欽定四庫全書

兩宋名賢小集卷二百八十一

宋 陳思 編

元 陳世隆 補

蒙泉詩藁

李濤字養源臨川人有蒙泉詩藁

南山

南山思美人也

彼美人兮在南山之陽豈不爾思道阻且長彼美人兮
在南山之側我不見兮寤寐思服彼美人兮悠悠我思
何以予之瓊瑰玉珮

南山三章章四句

登高丘而望遠海

登高丘望遠海萬里長城今何在坐使神州竟陸沉夷
甫諸人合薤醢望遠海登高丘知我者謂我心憂不知
我者謂我何求歸枕蓬萊漱弱水大觀宇宙真蜉蝣

讀阮籍詠懷十七首

人生天地間如花開春時遇晴即欣榮遇雨還離披晴
雨由上蒼汝花何悲為顯允阮嗣宗放達世所推憂思
獨傷心作為十七詩感慨懷辛酸似未達天理既好王
子喬又惡輕薄子善善又惡惡好生而惡死如何得微
稱口不挂臧否

處事

處事無心萬象春任渠逆境自橫陳籠中無療家貧藥



門外有催詩債人酒盞濶踈瓶久卧文書散亂案多塵
生前富貴非吾願肯學痴人問大鈞

詩社中有赴補者

有詩千首可成名萬戶侯封亦可輕自是高標凌富貴
肯隨餘子逐恩榮君遊壁水甘芳餌僕為銓衡上玉京
水鏡蘭坡各求第詩盟似未十分清

新年開義館教族屬子姪作詩勉之

日與聖賢居其中樂有餘但存三寸舌讀盡五車書學

問勝金壁功名特土苴先當分義利毋作小人儒

蘭坡過省

俯隨韁鎖就科名可笑蘭坡未苦清
不管北山怨猿鶴竟從南海掣鰲鯨
賞延於世愧在我思濟斯民同此情
軒冕倘來來則受未來猶可以詩鳴

詩友作涉江采芙蓉觸撥鄙思亦成一首

涉江采芙蓉江水濕吾衣
厲揭不憚煩將以遺所思
所思不我見持此將安歸
野花逞姿媚衆好紛莫違此物

何足嘆但傷愛者稀

春晝回文一首

茶餅嚼時香透齒水沉燒處碧凝烟紗牕閉着猶慵起
極困新晴乍雨天

贈染花徐仲湘

頃刻花開奕葉光花間奇字兆災祥神仙幻術從來有
昔日韓湘今仲湘

雜詩十首今取其四

滔滔東流水赴海無歸期
亭亭在轉日今茲復來茲
人生寄天地百年七十稀
思慮復營營恐為達者嗤

燕雀賀厦屋蟲蟻暮腥羶
野花引飛蝶古木來嘶蟬
秋天百蟲吟春天百禽喧
翟公真闇事喜愠見色言

明主不棄士我自志山林
爵服豈無華才疎力難任
鳥向深山棲魚向深淵沉
吾亦愛吾廬高歌復微吟

深巖有老翁龐眉鬚鬢雪
夜半呼吾名授我微妙訣
字畫古籀樣體勢訛復缺
雙眸忽炯炯須臾竟披閱
至今

得其傳心會口難說

琴書

琴書隨分足生涯只灌園畦亦自佳行狀是劉斯立記
門風似杜少陵家添詩人瘦因中酒解睡魔園只上茶
無事出門覓詩料巡簷指點數梅花

寄范稅院倚衡

清敏當年宰寶唐至今遺愛在甘棠稅苗有例分三等
史卒無因下六鄉時異事殊民尚憶人亡政息事堪傷

如今白納重催吏也坐先生對越堂

次韵平埜王子厚登相山不及相過

兒童傳好語王子去求仙我住亦只邇君胡不惠然相望百里外一別五年前會聚渾閒事鷺鷥盟要堅

題袁叅父神心精舍

山川城郭同一形市人鴉鵲同一聲吾身本自備萬物萬物何有非吾身此心虛徹公則明事至能應物能名君不見神心精舍袁主人叱咤風雷呵鬼神

僧本均乞蒙泉稿均號脩然

近聞甘子說僧裡有脩然詩學貫休體心參馬祖禪箇
中真有得名下豈虛傳索我蒙泉稿因風寄此篇

題盱江王章甫梅境

仙伯當年亭植梅當今天子題品來梅花是我丈人行
見梅不賦梅應哈王君結廬在梅境日與梅兄相追陪
吟詩些起逋仙魂索笑醉街工部盃吾聞梅乃萬木母
桃為奴婢李輿臺一陽生子萬物始梅花獨先羣卉開

一陰生午萬物成梅寔獨先羣鶴胎華寔先天天不違
梅之時義大矣哉紛紛餘子不知本祇說百花頭上魁
此語聞之梅亭翁錄以贈君君勿推

為廣壽長老文傑說嵩溪偈

隔江招手見高亭來謁嵩溪聽水聲縱是遠公今不出
也須強起送淵明

為能仁長老本端說無學偈

十二時中六不收了然無一事為頭禪河既寂無由浪

此岸已離那用舟塵世榮枯真幻夢涅槃生死是浮漚
要知無學用工處十二時中六不收

三月十六日西湖聞杜鵑

纔上蘓堤聞杜鵑杜鵑怪我在天邊平生不作功名想
今日胡為富貴牽辟穀未能那廢食買山所欲尚無錢
但須兩事畧如意便占白雲深處眠

訪林龍發

車馬喧聞桃李村誰人復識老梅尊時中只有梅亭姪

來訪西湖處士孫

兩宋名賢小集卷二百八十一

欽定四庫全書

兩宋名賢小集卷二百八十二

宋 陳思 編

元 陳世隆 補

可齋詩集

李魯伯字長孺號可齋懷州人寓居嘉興寶祐中第
進士天才卓絕儒而知兵宦轍遍天下所至得將士心
仕至觀文殿學士贈少保開府儀同三司魯伯初與

賈似道俱為間帥邊境之事知無不言似道嫉之不
竟其用有可齎類藁

庚戌過浯溪讀中興碑

崑山一何青浯水一何綠上有唐朝碑蒼崖與天矗清
廟倣遺音靈武號實錄其筆走風雷其文貴金玉曾經
兩賢手足耀千載目後來紀名氏全饒後且續豈無黃
絹詞中寓白圭讀一詞不敢措我懼此碑辱雖然勿泥
古詠嘆豈不足嶽將降甫申吾皇車攻復將墨東海水

且汗南山竹勒功岱嵩頂豈曰清溪曲

己亥題茅山玉晨觀

烟雲作嶂松作關夜深迫人星斗寒分明已在天上坐
不可更作人間看須臾睡去復睡覺髣髴前身在巖壑
洞門鎖鑰呼未應時有天香暗飄落

登郢州四望亭

復出烟塵表乾坤指顧中數峰連野迥一水與天通沙
外迎孤鷺雲邊數亂鴻家山在何許心與大江東

登閬州錦屏山

久識屏山面今朝得勝遊
橋梁橫古渡樹影倒中流
風定春檣度煙輕晚市收
凭欄誰領解一鷺點沙洲

淮西幕自皂口入潁道間

竟日百餘里相逢三數家
平岡盡茅葦沃壤舊桑麻
短樹巢歸燕荒城宿亂鴉
興亡誰與問馬首夕陽斜

小亭閒止

草草家林適時時步履過
跨流通略約枕岸擬牂犵
牆

外千竿竹亭陰數畝荷年豐遂閒止老境足婆娑

招里巷諸友和韻

小有家林適歸來已恨遲引杯懷楚舞飽飯和陶詩慷慨多新語綢繆半舊知夜深橋雪滑亟命短筇支

出郊劄農口占

小約賓僚集相招父老耕寺依青帶佳人在翠帷行壘嶂堆春色微雲護午晴時康田里樂歸騎踏花輕
禁烟前一日招幕屬小集林提幹有詩和韻

草草登樓適英流邁昔賢詩篇長慶集人物永和年訪
古宜聯社傷春又禁煙青帘家酒賤賸飲莫論錢

桂林卽事

一日四時具從來五嶺然留連落花雨依約熟梅天瘴
重常隨筇春深未脫綿新來那戒飲未夜已思眠

月峽城樓

雲罽前溪洞烟荒隔岼城秋旗雜山色曉角帶江聲駐
騎須邊靜維舟待峽平掀髯聊徙倚一雁楚天橫

首夏而有秋意

纔過清和候，淒然感旅懷。
新蛩迎古砌，落葉滿前階。

葛葉

夏落榴火春仍駐，槐屯午自佳。
憑詩寄風土，歸以語朋儕。

宿中洞

梅老傲前嶺，梅疎卧淺溪。
避風巢上鵲，喚雨竹間鷄。
野迴夕猶牧，田乾春未犁。
路遙人倦甚，只向近林棲。

過衡陽晚宿

雨後春寒力，山前夕照斜。
身猶尋壘燕，聲雜宿林鴉。
過



嶺尚十里隔春能幾家
母嫌茅店惡窗下有梅花

將到永州宿村舍

野宿孤村迴山行十里荒
犢眠新草壤馬踏落梅香
入眼春晴薄打頭風勢揚
莫嗟登陟苦明日看瀟湘

入清湘界

漸近湘山境土風清且饒
林巒接墟市水竹帶溪橋
焙出新茶煮帘垂老酒招
春和民氣樂幾日是花朝

寧國道間喜晴

怪得虛簷寂溜聲起來雲淡月微明只消一夜西風力
盡埽千山宿霧清農舍少酬終歲望客途擬過小春晴
枝禽亦似欣春意飛入煙林自在鳴

利州登棧道

足跡初來劒北州試登危棧瞰江流萬山西接地窮處
一水東歸天盡頭欲訪嶠函無健馬相忘楚漢付輕鷗
丈夫要了中原事未及持竿老釣舟

簡項仲宗游亭臯

試從沙渚入荆城十里金堤掌樣平
曉露香留紅芡溼
午風清逐白蘋生
柳邊繫馬頻沽酒
沙際呼魚旋作羹
所欠直惟佳客耳
明朝能暇輒偕行

丙午九日將過陽羨偶成

年年秋晚對風沙
今近重陽喜在家
自斷此生甘皓首
能消幾度看黃花
閒身頗覺便筇竹
醉態都忘脫帽紗
且問小舟溪上去
飛鷗數點夕陽斜

題宜興菴壁二首

淳祐庚戌覃懷李魯伯因觀農來此得四十字是日
微風扇和輕雲閣雨千峯翠滴四野綠秀枝禽對語
春意駘蕩無極徜徉久之緩轡而去賓佐四明史偉
之廬陵魯垓眉山楊埏東嘉林拾三山卓炎于廬陵
王真孫長沙胡盛盱江周子榮潼川楊牧之清湘滕
處厚續至

老龍昔未蛻嘗蟄此山中霖雨春疇足風雲夜壑空兩
厓高下倚一逕往來通不願千金劑惟祈百穀豐

遊千山觀

有序

河內李魯伯再牧桂之明年實開慶改元上命三衢
柴士表視邊隘竣事將還夏六月二十一日約憲倉
四明豐蔭兵師汪光朱廣用符離朱煥載酒千山觀
訪招隱過仙奕感今懷昔風物固無恙也時火傘張
空水花蘸碧相與徜徉其間清不受暑因得四十字
并識諸石

自從來嶮嶠豈暇訪湖山
綰綺行邊了戎旗護戍間相

看羣玉外一笑六郎間回首西風靜何愁老漢關

游桂林西山

玉筍環星拱青螺帶霧披山為天下勝境占嶺南奇援
筆難窮者憑闌盡目之不因無世累築室在於斯

善權奇觀

自從團結此山川便作人間小洞天佛母林深從古盛
仙翁宅近至今傳青分三洞中開戶白瀉雙巖下出泉
我自有緣聊乞取萬松陰裏一牛眠

欽定四庫全書

兩宋名賢小集卷二百八十二

兩宋名賢小集卷二百八十二

欽定四庫全書

兩宋名賢小集卷二百八十三

宋 陳思 編

元 陳世隆 補

招山小集

劉仙倫一名儼字叔儼廬陵人詩名聞海內先後與
劉過並稱所著有招山小集

中秋有懷

吾廬有寒梅老幹秋風多上有雙棲鳥夜月聽我歌一
別三載強梅影應婆婆鳥今來不來奈此明月何

梅樹歎

誰將和羹姿植彼江之墳老葉纔脫柯生意覺已欣寒
流帶孤標淡月寄一痕莫作搖落看下有春風根

水楓歎

楓葉不耐冷露下燕支紅無復戀本枝策策隨驚風鄉
來樹頭蟬去盡不見蹤日落秋水寒哀哀叫征鴻

得蟹無酒

水鄉秋晚得白蟹望斷碧雲無酒家此意淒涼何所似
淵明醒眼對黃花

盱江道中

過雨青山啼杜鵑池塘水滿柳飛綿田家正是忙時節
女採桑歸男下田

有懷二小姪

殊鄉憶諸孫觸緒成歎嗟阿獐早失父玃玃垂兩髻已

知陟岵悲啼哭聲啞啞阿贛幼豐下出入常隨爺別時
俱學書落紙翻老鴉倒指今三年為學當日佳應解對
我兄言叔不還家何時重挹持課書賞梨楂看渠俱成人
憐我雙鬢華侍我兄弟醉會當相扶義

贈曾相士

大曾兩眼如磨銅坐上一顧凡馬空發天機緘被天惡
老死不遇悲途窮小曾短小眼如鶻冷地看人看入骨
誰云輪扁不傳心獅子還生獅子窟倒拖拄杖行九州

平生慣識公與侯得錢送家養老母衣袂慘淡行囊羞
我慵百事不入耳休說功名老無味他年相伴竹溪頭
同採芙蓉渡秋水

西林留題

路入康廬西復西翠煙生處着招提山僧幾輩雪垂頰
水鳥數聲雲漏溪莫對青山談世事且尋粉壁看留題
禪房夜卧衣裳冷夢破鐘聲落月低

盱江驛舍中有婦人書一憶字筆勢頗姿媚游子

明王相之皆題詩其後率余同賦

陽臺雨歇行雲杳天濶鴻稀春悄悄鷓鴣孤眠怨芳草
夜夜相思何日了妾非無聲不敢啼妾非無淚不敢垂
柔情欺損青黛眉夢魂暗逐蝴蝶飛春風着人瑣窻綠
綠窻書字寄心曲細看香翰婉且柔中有閒愁千萬斛
向隅棄筆惆悵時此情默默誰得知無緣相見空相憶
不如當日休相識

盱江道中

屈曲清江繞徑斜綠陰深處隱人家嵐昏山色未還觀
水落漲痕猶在沙麥熟村村喧水碓蠶成處處響繰車
馬頭忽覺清香近路轉橋南有野花

輓萬知丞

大策雄文屢決科可憐身世竟蹉跎韋編絕後門長閉
衫色青時鬢已皤楚澤風烟間簿領藍田松竹飽吟哦
詩魂今夜誰招得奈此西山暮雨何

哀青樓曲

東風吹衣樓百尺青錢喚酒春壺碧樓中女兒顏如花
欄干徙倚春無力翻騰舊曲偷宮商顧曲豈怕周家郎
態濃意遠淡梳掠依約風韻追韋娘樽前時復度芳眄
長恐秋波落金盞自言流落小民家似恨相逢成太晚
吁嗟綠綺琴絃絕無知音行雲忽何處十二巫山深巫
山深兮君不來春無色兮意徘徊夕陽下兮猿呌哀可
憐宋玉空多才

送徐淵子知縣二首

君作西昌宰人如太史賢
化行黃犢外心在白鷗邊
訟理無公事官清祇俸錢
蓬窻載書畫頗似朱家船
城郭春寒夜郵亭小泊時
相逢一樽酒共說十年詩
風雨成輕別江山莽後期
著鞭從此去早到鳳凰池

過嘉興

惆悵嘉興路三年幾度經
航船連夜發更鼓隔城聽
落月低烟樹秋風冷露螢
客懷容易感宜醉不宜醒

陳惟定得蜀墨一笏于觀音老僧磨試奇甚落刀

中分賦此為贈

吾聞蜀道如天高寸步千嶮愁猿猱蒼官老據岷峨上
誰肆斬伐焚其膏坐封長鯨割其白丁當萬杵春成膠
甄陶出此數寸玉山靈河伯俱呼號蜀人寶之夜光發
六丁竊取潛逋迹龐眉老僧抄化得要與抵樹供題抄
却憐南澗詩壇豪贈之為染霜兔毫欲令拍肩李供奉
脫靴醉換紅錦袍梅坡覓句心切切沈著無處安推敲
陳元嫌我窮到骨隨世冷煖成絕交賢哉南澗得此寶

中分肯落并州刀得之欲顛喜欲舞助我詩思來滔滔
自臨清流洗破研赤脚不怕風霜饕歸來小試病風手
玄雲淪淪生烟濤未能接武居螭坳萬古一筆定貶褒
為君且費千幅紙鴉兒大字書離騷

熊師生朝

南極星明夜未央將軍初度近重陽平生忠義心如鐵
今日棲遲鬢點霜沙漠草凋胡馬健玉關秋老角弓強
朝廷緩急須公出更看黃花晚節香

以騎驢鍾尨送秦先之

髯鍾矍鑠老據鞍曾入大內見阿瞞幞頭垂脚藍綬敵
不知班簿為何官天寒歲晚日云暮霜風吹驢耳卓墜
老臧負笠衣裳單反袂掩口趾穿屨華門我恐難畱君
收卷送似秦將軍將軍文事有武備眉骨自是凌烟人
汝當訶護謹厥職勿但縮頭徒掛壁將軍來歲在殿巖
豐汝牲醪作除夕

秋夜長曲

秋夜長秋月明愁人不成眠搔首行中庭天高氣肅萬
籟息銀林凍損寒露零碧梧已蕭條棲鳥中夜驚枯荷
倒秋水夜氣水流螢銅壺悲咽漏下澁深閨何處鳴寒
砧亦有朱門人環坐圍娉婷玉觴催喚酒銀甲紛彈箏
衣篝龍腦熏綉被珊瑚枕煖愁鷄聲秋夜長秋月明此
時幾人知此情

魏塘道中

霜葉紅于染寒溪湛若澄幾聲歸雁急數點暮山青淺

盞頻斟酒長塗小作程萬緣天已定得喪一毫輕

題惠崇鷺鷥

清霜着木高柳枯驚風獵獵吹寒蘆蘆根敗蓼色慘澹
沙觜無復菰與蒲風標皎皎四公子來從西雖有閒思
肝腸澡濯秋水清雲衣不受泥土滓偶得一飽即自如
鵬飛萬里何關渠出離風波岸上立豈只臨淵常羨魚
惠也小景稱獨步那知寫生尤得趣傍邊謹勿生機心
恐即長鳴過溪去

江亭晚望

瘦筇支我碧波彎
小倚危亭取次閒
斷雨挾雲歸嶺嶠
怒濤推月出雲間
猿啼遠樹家何處
雁斷西風鬢欲斑
歸計未成秋又老
浩然無語對南山

仲立於枕上和余韻
夜半得句敲問喚
余予乃攝衣而起
相與對語於野航
橋上殊為勝絕
因再用前韻

夜半詩壇喜解圍
楚天雲淡玉繩低
撞鐘自得興不淺

泣鬼初成人未知踏月過橋驚鶴睡犯霜對語伴烏啼
蕭條此意興重見絕勝圍紅醉玉卮

李泰伯祠堂

城西泰伯舊祠堂碧蘚斑斑草樹香曩昔功名雲樣薄
後來文字日爭光蒼髯冉冉猶含怒辯口瘡瘡尚帶霜
若使先生居戰國不知何道處齊梁

送陳維定維定有伏闕上書之意因以箴之二首
征衫結束賦歸與出得樊籠氣便舒爲福定知因失馬

浩歌元不嘆無魚江湖是處堪垂釣虎豹當關莫上書
食肉宜憂我何預問津恐復遇長沮

傾蓋相逢二紀前六回相見兩華顛詩成神鬼皆遭役
命薄文章不值錢北事如斯君可去西齋重到我淒然
他年卜築如相覓更約西山暮雨邊

寄蕭彥毓

蕭郎門巷近何如想見青青長碧梧樓外青山無恙否
琴中流水有知無他年歸索惟詩卷別後春風滿酒壺

望斷碧雲無過鴈夕陽歸鳥沒平蕪

張漕仲隆快目樓

天上張公百尺樓眼高四海氣橫秋
祗愁笑語驚閭闔
不管闌干犯斗牛
遠水拍天迷釣艇
秋風萬里入貂裘
面前不着淮山礙
望到中原天盡頭

寄韓平叔二首

相從車轍半江西
同歷悲歡共險夸
孺子亭前春繫馬
庾公樓下夜聞雞
放懷呼酒長歌日
促膝挑燈細語時

暗憶淒涼多少事此情不語有誰知

淡烟秋水白漫漫夜別江亭劍氣寒千里思君愁月色
有時無語倚闌干倡酬詩卷應無恙耐久交情過後看
他日歸舟無俗客撐篷容我話辛酸

臨川報思寺與涂子載陳惟定分韻得丹字

杏花枝上雨初乾梵宇苔深碧瓦寒三客燈前共湖海
五言詩裏定金蘭殘年短髮因愁白多病衰顏借酒丹
後夜相思月千里不堪獨自倚闌干

欽定四庫全書

兩宋名賢小集
卷二百八十三

十

騶馬行

憶昔初見騶馬歸主人愛馬過愛兒丁寧圉人謹相視
一夜十起芻秣之長年煮料雜以豆按時飼馬欲馬肥
爬梳剔抉去疥癢裂鼻灌藥煩獸醫膘成十箇料花出
加以膏沐膏其皮青絲絡頭鞍轡好鍍金作韉光陸離
主人愛馬馬戀豆牽來顧主時驕嘶口才三齒力方壯
未老保主常乘騎淮南忽然有馬至骨骼比此尤雄奇
騶黃鐵脊豹其脚雲鬃霧鬣風披披刺頭齒鄰過若電

脫兔奔鹿何由追
主人意却在新馬
衆口共譽無一違
停燈在廐潔水草
恰似騶馬初來時
騶馬在傍意慘淡
雖未見斥頭已垂
嗚呼騶馬勿用悲
自古世事皆如斯
幽王昔日娶申后
既得褒姒后寵衰
楚王宮中棄前魚
紅袖嗚咽流涕洩
人心改變在頃刻
嗚呼騶馬勿用悲
嗚呼騶馬勿用悲
淮南無日無馬來

寄朱濟仲

家在三千里人來天
盡頭角聲連夜月
草色帶邊秋妻

欽定四庫全書

兩宋名賢小集
卷二百八十三

十一

子仍多病音書缺寄郵歸心與寒鴈先已過瓜洲

兩宋名賢小集卷二百八十三

欽定四庫全書

兩宋名賢小集卷二百八十四

宋 陳思 編

元 陳世隆 補

庸齋小集

沈說字惟肖龍泉人寧宗時為仁福邑尉晚年卧病
不出營別墅以居田衣山履不入城府故其詩有云
蚤辦山中計吾今省俗緣又云江湖成夢事投老属

山林有庸齋小集其詩一洗濃厚肥膩而出以清淺之
筆時有雋永句令人尋味不厭

立秋

昨日午時秋西風夜轉頭吹來溪外雨藏却樹間樓暝
帶棲雅色涼催客燕愁一樽吟未了衰鬢早颼颼

仁福道中

山徑少曾平人煙隔隴青淺流分石渡低樹礙輿行稅
籍全編戶村童半壯丁我來官此地三度究民情

偶成

讀罷黃庭一卷經
磬殘烟冷夜壇清
月明何處人開戶
驚起松梢睡鶴鳴

征途

桂管三千里
征人一寸心
自從登驛路
幾見換鄉音
古樹春陰薄
寒塘野水深
渴行呼得酒
瓦椀不辭斟

暮春

燕翼初乾綠蒲池
桑陰收盡麥黃時
一年春事又成夢

幾日愁懷欲廢詩料理病身嘗藥遍指摩睡眼看書遲
脩然獨倚闌干立花下狸奴卧弄兒

紙衾三首

碎搗霜藤月下砧清泉瀉出簾紋勻老翁採菊歸來晚
剪得山南半段雲

繭面新乾帶露柔春回斗帳伴吟愁殘年已辦蒙頭過
風雪從教打戍樓

一幅新裁碧澗冰野人留客宿雲層山房却好松膠熟

夜半無眠話葛藤

春詞

水漲寒溝柳又陰
小窓風度一聲禽
若將離緒繫春事
片片飛花是客心

送何權院之官金陵

分司陪宰掾
賜勅帶朝銜
見說成行李
無因別去帆
秋風石城路
夜月雨花巖
料有驚人句
鴻邊寄短函

溪樓

心遠俗塵隔樓高野興多
稻花黃雀雨山影白鷗波
灘澁推船上橋危挽客過
日斜欄倚遍無句奈愁何

寄張永堂

浙江風浪濶夢不落吟邊書到知何日
君歸想隔年才高朝士重命拙故人憐
早辦山中計吾今省俗緣

烟浦

烟浦殘雅舞夕陽風枝病葉似初霜
眼中秋色十分淨沙外寒流一綫長
溪女得魚烹碎白田家收穀晒新黃

偶尋野趣歸來晚
草際螢花點點光

渠流

岸石濕黏萍
一渠流水清
每來疑雨過
少立見魚行
樹隔炎歊遠
橋分午影平
主人耕幽事
客到出相迎

安石嶺

茅屋鷄聲勘夜分
杖藜挑月帶餘醺
不知身在孤峯頂
回首人家盡白雲

縉雲道中

去作京華客離家此月前問程恰中道類日近殘年山
雨易成雪村雲疑是烟僕行愁不進添乞

去聲

酒漿錢

次韵立方何園

春事覺垂垂春行似後期草根花片積人語鳥聲隨酒
病因過量暮輸為好奇欲歸愁路遠月色若為私

次韵永堂

鶯聲未改春葉底一蟬新幻境老無夢醉鄉詩有神整
巾因把鏡懶語怕逢人似此衰遲者勞君料理頻

古樹

古樹被青蘚蟠溪作卧龍窮冬不蔽日入夏却生風枝
少禽難托根空蟻聚封幸為斤斧棄得老雪霜中

買舟

租得舟如葉低低半搭蓬僅堪容野客還喜反漁翁湖
水斜分浪懸崖送闕風去程應不計且泊槿花叢

明融盆池二首

涼入湘簾影半開小窻午枕夢初回蕭疎數葉秋菰上

也解聲聲報雨來

老瓦盆深漾細萍雨多流却半升青夜涼偶出庭心看
缺處光涵三兩星

聽雨

耳根聽不歇滴滴冷於秋疑是山翁醉巖前枕瀑流

晚春

白頭何計是生涯日日樽前卧落花綠滿池塘無一夢
夜來風雨過誰家

贈段琴

我琴未經時渾然心與耳自從識開指反為琴所使清
風千古曲雪澗敲寒玉誰能繼此音蒼梧泣修竹

食梅

兒時摘青梅葉底尋彈丸所恨襟袖窄不憚頰舌穿我
年不自覺以我齒尚完嘗新試一薦喉棘眉光攢豈味
不悅口豈老難強餐人生煎百憂筭梅未為酸

秋詞

雨放涼飈晚復晴小窻人亦共秋清月華網在蛛絲上
錯認踈簾挂水晶

閨詞二首

密幄香燒錦瑟橫佳人半醉覺寒輕忽思塞下新番曲
彈作黃蘆孤雁聲

冬事侵尋渾未知隔隣聽得理寒衣驚心步出庭西曲
日影斜斜木葉飛

馮公嶺

曉上馮公嶺艱難見客情
雨和殘葉落身逐亂雲行
野店山腰出秋泉石罅生
若將世途比此路更為平

山中秋興

山戶少曾扃居貧易得清
秋衣和月卧溪茗襟雲烹
學字書紅葉看騷些落英
從他頭早白心事總和平

別墅

野舍清溪曲連茅接樹陰
呼童隣錯應貰酒婦同斟
落照收殘雨寒煙出寸岑
江湖成夢事投老屬山林

次韻古愚立冬日觀鞠

間繞籬頭看菊蕊深黃淺紫自窠窠清於簷蔔香九耐
韻比倚蘭色更多九節翻疑今日是一樽未覺晚秋過
從教白髮須簪偏且任當筵作笑歌

竹色

竹色留清睡薰風晝一簾懶因人事少病覺老顏添聞
檻臨昏鏡齊書補墜籤晚蟬聲欲斷新月到虛簷

曉色

曉色闌干外，悠然一次伸。
雨中無過鳥，煙際有行人。
樹濕清陰重，沙坍潦漲新。
憑誰借蓑笠，整釣傍溪隣。

薊溪途中

天風吹落日，秋色上遙岑。
倦客未投館，棲鴉已滿林。
妻孥非遠別，歲月易驚心。
市酒不成醉，新蛩助我吟。

雪

凍項縮如龜，茅簷賦雪詩。
冷於初下日，好是未消時。
樹重高枝折，窻明曉色遲。
忽思溪上路，擬借蹇驢騎。

遊真巖

一逕入松林真巖峭莫尋山空泉自落日出地長陰鶴
去仙臺淨丹成古井深殘碑看未了屋角轉幽禽

送周堂長歸慈溪寄何贊府

慈溪隔楚雲問下接鴻鱗因送還鄉客重懷泣邑人海
明看出日山曉倦行春料得雙松下吟成瘦鶴身

遊化雲山

入門松作逕步步接秋陰山帶孤城起雲歸古殿深隔

池聞鶴唳倚樹看僧吟
笑指煎茶處青煙出竹林

題黃止菴詩集

燈前幾寒夜編得近詩成
對客時許看歸囊喜帶行風
高霜鶴健未落澗秋清吟到無吟處蕭蕭白髮生

釣臺

山東江流起素湍羊裘立盡暮雲寒
早知釣餌成虛設多却當時一釣竿

西湖獨步

平湖開霽色寒碧照空心小立背橋影緩行隨柳陰幾
年勞遠夢到日記曾吟荷蕩成菱地蕭蕭秋意深

送何水竹需次入剡易齋赴浙漕

弟兄聯騎出秋色赴行裝慈水瓜應熟孤山挂又香對
牀村店寂起飯曉燈涼到日分吳越江流兩岸長

南坡不以科目自累而以風雅自鳴請余為賦

鳳銜科詔出祥雲底事儒林有逸民四海聲名難著我
一坡風月正宜人鏡留白髮非遮俗家釀黃柑可接春

只許詩朋自來往素袍青履華陽巾

鷄鳴

鷄鳴霜葉下月在紙窗寒客路千家曉山居一枕安秫
收催歲釀並種接春盤縱有少年夢其如心事闌

寄永堂

落日照江東思君訖便風棲遲定何處約莫過殘冬小
隱時曾到安書久未通自憐心易老盤屈似寒松

送觀過免舉赴省

樽酒逢臘近行李獨西征事歷風霜慣春回雨露生一
經家自學千佛世題名昨夜瞻奎宿寒茫萬丈明

茅簷

茅簷夜雪曉開晴自洗寒衣漉澗清如此過冬何不可
梅花休笑鬢星星

冬半

歲逢冬欲半心事更迢迢細雨寒窻閉孤燈長夜挑遠
書如夢寫新酒帶愁澆明日有幽興尋梅到石橋

輓鮑監鎮

一紙辟書馳華年發軔時排雲何不到殞露遽如斯幼
子未知父偏親反哭兒有書來謁些忍淚看埋碑

送何仲遠適越因之官霅水

樽酒沙頭綠漲波事歡其奈別愁何去程想憩蘭亭竹
到日須看雪浦荷年少莫嫌官職小名高却怕薦書多
臘前擬作孤山夢還許扁舟載雪過

簡柳濬卿

一別竟三年相看事宛然旋添新筭髮猶聾舊吟肩紅
日征途外黃花喜氣邊不須勞記問姓字有人傳

一作蒜

秋溪

迎月步秋溪蘆長與樹齊水光連漢近夜氣壓山低岸
隔呼漁渡林疎見鳥棲酒微風力勁歸袖冷淒淒

欽定四庫全書

兩宋名賢小集卷二百八十五

宋 陳 思 編

元 陳世隆 補

葛無懷小集

葛天民字無懷山陰人好學攻詩忽祝髮為僧更名
義銛字朴翁其後仍返初服隱居錢唐湖上足不入
城市日惟吟咏自樂有無懷小集

春懷

向晚一鳩鳴道人春睡足無處寫幽懷巡簷數修竹

絕句

夜雨漲波高二尺失却搗衣平正石天明水落石依然老
夫一夜空相憶

看山

我本田夫作比丘也知騎馬勝騎牛如今馬上看山色
不似騎牛得自由

寄楊誠齋

參禪學詩無兩法
死蛇解弄活鱖鱖
氣正心空眼自高
吹毛不動全生殺
生機熟語却不排
近代獨有楊誠齋
才名萬古付公論
風月四時輸好懷
知公別具頂門竅
參得徹兮吟得到
趙州禪在口皮邊
淵明詩寫胸中妙
用則致君堯舜前
舍時便灌廬陵園
六十四卦只兩畫
三百五篇惟一言
我與誠齋畧相識
亦不知他好官職
但知拚得忍飢七
十年春梁如鐵心
如石不曾屈膝不

皺眉不把文章做出詩王川後身却不恠樂天再世尤
能奇隔千里今共明月何似寒灰相對撥公亦何須要
我知我只欠公頭上髮

醉書酒肆

碧牀酒盡香拍浮吳姬粉醉不識愁黃金手揮博歌舞
夜半春回楊柳樓

竺澗梅

龍脊橋邊鶴膝幽一枝斜亞水橫流自從識破胡笳曲

吹徹黃昏不解愁

謝文思徐敬伯見訪

半山徐敬伯薄宦在中都柳舍偷閒到村醪就近沽易
添詩債負難得醉工夫却羨漁樵叟雖貧一事無

即事

春漲侵高岸春雲裹亂山倒遷楊柳活斜倚桔槔間世
味老方淡花時晴最慳東風嗔嬾動故故撼柴關

重訪白石

長安惟白石與我最相關每到難逢面翻思懶下山欲
歸愁路遠小住待君還盡日看幽桂無人似我閒

達摩渡蘆像

一言已出駟難追賴得君王放過伊楊子江心杭折芰
浪頭何似問頭危

收白扁豆因得二首

齒髮中年態丘園素隱心因栽白扁豆欲當紫團參篋
管收繁英窻扉失茂陰蕭蕭簷外竹抱蔓替余吟

古香無伴侶一榻共雲分
澗水塘頭過樵歌枕上聞
余生聊自適此意與誰論
落葉如相慰時敲月下門

仲春初二絕

落梅如雪雨如麻最怕春寒是
杏花病後不能涓滴飲
可憐芳信到貧家

初交二月草蒙茸
隣里紛紛去折蓬
柳下閉門非嬾出
苦無筋力趁兒童

湖上夜歸

陌上紅塵歇湖中翠靄生定鐘山寺迥新月夜船清蛙
亂鳴方急鷗閒睡不驚兎曹知我到認得打門聲

聞鳩

蟄動猶寒在鳩鳴恰睡餘素傳鷹羽化多占鵲巢居報
我晴何用憐渠拙自如年年偏感處風急杏花初

迎燕

咫尺春三月尋常百姓家為迎新燕入不下舊簾遮翅
濕沾微雨泥香帶落花巢成雛長大相伴過年華

玩蝶

粉翅來何許春風卒未休
衆芳皆舊識微雨是新愁
鬪舞圍牆角貪香綴蕊頭
與花俱不語相可自風流

聞杜鵑

望帝知何苦催歸不自禁
竄身依樹密啼血染花深
細雨離人淚遊絲蕩子心
青山明月夜老耳最知音

湖上觀柳偶記龍泉先生句
春柳一絲之句感而有述

斷槎無葉入無枝得似勾春柳一絲不是畫船栖泊處
白鷗飛下立多時

嘗青梅

疎影橫斜處匆匆入夏看綠陰遮得暗青子結來酸因
病全疎酒如癡猶凭闌楊花無藉在風急正漫漫

開井

小圓新穿土中藏一丈空山腰泉脉透井口樹陰蒙洗
藥先資用煎茶已見功甘涼羞自薦汲許四隣同

龍井

龍護深潭草木昏
斷碑元祐典刑存
蜀仙已去吳僧少
嶺上松篁亦斷魂

江上

連天芳草兩漫漫
贏得鷗邊野水寬
花欲盡時風撲起
柳綿無力護春寒

望越懷親

高帝陵邊我故廬
白雲慘淡帶蒼梧
歸心政與江流動

更著青山隔岸呼

寄輔漢卿

憶殺平生輔漢卿
武夷山裏話寒更
不知新歲還家未
白髮衝冠有幾莖

訪端叔提幹

月趁潮頭上山隨
拖尾行大江中夜
滿雙櫓半空鳴鴈
冷來無幾鷗清睡
不成平生師友地
此夕最關情

山中題古墓

冢荒無樹亦無碑
土面磚痕似灼龜
壤道尚存翁仲守
傳家知是子孫誰
文成東海終難料
欲錮南山最可悲
要寄此情浮世去
臨流說與落花知

題謝耕道一犁春雨圖

耿耿思田舍
悠悠倚釣竿
一犁歌短闕
十口飯長安
老覺驅馳倦
生知稼穡難
畫圖詩卷在
留與後人看

即事

暮年居柳下
終日閉柴門
壁為題詩暗
池因洗硯
渾閒

知真富貴醉到古乾坤回首長安道無言只斷魂

偶成

始參龍象種終現馬牛身再整衝冠髻難忘漉酒巾散
花天上女撥草道中人寄語林和靖非翁不卜鄰

竹

此君別後稍添丁留得清風鎮戶庭老髯猶不禁霜點綴
舊隣多似樹凋零一竿帶雪寒垂釣數畝連苔晝掩扃
此話有誰堪委似幾回無語向青青

蓬居咏枇杷

早誦相如賦知渠舊姓盧
花香冰裏見風味藥中須
細雨同梅熟清聲混樂呼
山禽嗔老子拍竹護金珠

元夕

天街夜鼓徹雲霄一望星
河影動搖佳節無如元夕
盛老懷不似少年豪紅塵
巷陌青絲輕明月樓臺紫
玉簫誰料南坡招野叟詩
肩相對兩峰高

簡道安

相將除夜南風起鴈已聲聲向北飛驟暖應知為雪骨
瘦年終不似冬肥日來病可方開酒節下春回稍減衣
正好伴公湖上去孤山觀裏看梅歸

澗泉招飲次日乃生朝

平生南礪古遺民初度招呼我輩人每聽謔談須絕倒
極知老氣正輪囷杯盤滿座添燈火兒女戒行勸主賓
但願吾儕似梅柳年年相見一回新

平居遣興

隔籬人語自喧朝
緊閉苔扉不許敲
談塵帶塵懸屋角
牽牛承露上林梢
投閒得計心常足
擬古成編手自抄
風雨欲來偏感處
蟻先移穴鵲移巢

桃花

洞裏桃花自古初
人間塵事幾乘除
重來漁父難相覓
前度劉郎未忍疎
畫幟迎逢春女渡
采符供奉歲朝書
嫣然自共幽篁語
占盡風光奈得渠

偶題

綠樹何稠疊清風稍羨餘枕縈雲片片簾透雨疎疎修
笕通泉壑殘碑出野鉏丘陵知幾變耕稼雜陶漁

西湖泛舟入靈隱山

晴嵐漠漠水溶溶落葉遮船翠蓋重秋色盡為漁者占
山光多向道人濃雲連合抱前村樹澗繞飛來小朶峰
送罷夕陽迎素月樓臺高下自鳴鐘

梅花

寄遠含芳別隴頭塵沙漠漠去無休誰招青塚千年魄

散作黃昏萬斛愁
畫角霜清腸屢斷
花光墨淡影空留
年年最憶前村夜
一段孤明雪亦羞

幽居

遠懷日與靜相宜
山色窺簾澗撼扉
野草自花聊獻笑
重雲不雨漫垂衣
人間事業難爭長
睡裏工夫獨造微
却怪蒙莊猶寐語
夢為蝴蝶未忘機

秋日湖西閒泛

雨洗千峰曉
波涵萬頃秋
菱花開古鏡
蓮葉度輕舟
思

遠人誰識身閒世不收
望中時得句倚櫂雜吳謳

郊園避暑

有暑猶當避無憂可得忘
竹疎身共瘦湖近意先涼
靜勝寧須奕幽酣不待觴
還同殘夢樂炙背負朝陽

小峰行樂却望北山

霜高羣木落湖上數峰秋
野笛歸牛徑烟蓑宿鷺州
望中多隱約佳處小遲留
百歲無虛日能堪幾度游

蝶

黛拂雙眉粉襯毫翅烘晴日伴相遭戲勾穉子從花遠
恐惹游絲莫鬪高栩栩倏來仍易散深深交舞為誰勞
吳王花草滕王筆千載風流敵楚騷

杏花

陌上春泥苦未乾絳唇漸吐不禁寒海棠向晚教誰伴
山帽衝風每自看聲好最憐清曉賣味甘長記綠陰團
年年過雨胭脂落時序闌心有幾般

林間石

摩挲只作釣磯看相伴秦翁且住山霜洗舊稜人共瘦
蘚侵孤韻鶴同閒因思樵牧分爭處已過唐虞揖遜間
風月滿林時憩寂三生幽事夢中還

小隱自題

水拍荒籬外山攢落照邊鴉鴉乘犢去鴨鴨伴鷗眠思
淡秋雲薄情高隴月圓武陵知避世初不為求仙

夏日池上

微波漾漾雨濛濛岸脚烟莎間水萍照影已無雙鬢綠

關心猶有一絲風
鴛鴦對浴紅衣撲
菡萏相親翠蓋籠
醉舞夢吟皆勝處
箇中非異亦非同

孤山後寫望

凭高每歎昔人非
空有羣峯礙落暉
大雅風流誰舉似
長安秋草又衰微
寒花負約開猶嬾
幽鳥忘機趣不飛
來往半生堪記處
西村燈火夜船歸

小舟

萬頃波中獨釣身
短艚低屋舊絲綸
自憐清夜歌明月

誰共滄洲來白蘋

梅花

桃李麤疎合負荆
歲寒標格許誰并
花中有道須稱最
天下無香可鬪清
倚竹向人如少訢
臨流窺影更多情
何當喚取湘纍起
伴我空山茹落英

孤山後舟中寫望

水接遙空分外寬
孤山月出靜中看
疑從弱水移圓嶠
似共姮娥住廣寒
秋雨秋風初過後
荷花荷葉半凋殘

西村數點歸鴉濕老子新題墨未乾

酬畫上人石湖春望

蕩蕩春風草木香茫茫澤國水雲長鶯來占柳為歌院
蝶去尋花作醉鄉閒與物情聊品藻老於文字嬾尋行
望中別有關心處幾度朝

湖村晚興

殘霞伴孤鶩晚燒雜斜暉秋向詩中出人從畫裏歸柳
塘雙漿急茆舍一燈微小艇穿籬入蒲蓬正擁扉

雪後

雪中多日靜湖上少人遊
禿樹花為市斷槎鷗當舟
一杯殘臘酒萬古夕陽愁
富貴非吾願葛天雲正浮
冷蘂通幽信孤山欠幾遭
杯因寒更滿句到淡方高
雪滴晴簷雨松翻夜壑
濤布衾雖似鐵猶念早趨朝

臘雪

片片嘉平瑞無聲有耿光
來雖成頃刻釀亦費商量
天闊花無賴風休絮不狂
孤山林處士魂在隴頭香

和子舒冷泉夜坐

亭空山盡入人靜夜初分喬木陰遮月清泉影浸雲不
題波上葉只採礪中芹澗水令人憶何當入郡聞

宿裴庵

一徑松杉迥成陰見日稀山晴僧盡出風暖燕交飛結
子花拋樹闌人犬護扉閒看山月上清坐更添衣

荅趙紫芝

九月東離嘉長安了歲華未登揚子渡先訪葛翁家天

作今朝雪燈開昨夜花一杯能強飲不必問丹砂

簡趙紫芝

紫芝雖漫仕五字已專城清坐有仙骨苦吟無宦情
囊因詩句重分與酒杯輕所好煎茶外燒香過一生

清明前四月泛湖

繞岸堆青嶂遊船滿綠波樓臺臨水近楊柳占春多
老去誰同調尊前且放歌韶華能幾日隨棹已新荷

送薛子舒船官

憶君江上去船重載書多學乃從吾好閒應喜客過薰
風新綠樹明月舊滄波自古關情處相思入詠歌

訪紫芝回與子舒集

君參唐句法親得浪仙衣薄宦因吟苦高風與世違春
寒留夜飲月黑借燈歸共隱知何日空山老薜薇

即事用天竺韻

寒食少逢天氣佳十朝九日雨如麻新巢唯有燕生子
小巷已無人賣花

夏日

曉荷承墜露晚岫障斜陽樹下池常蔭水邊風最涼蟬
移驚鵲近鷺起得魚忙獨坐觀羣動閒消夏日長

雜詩

下竺山前打一遭丁寧門子看溪橋恐驚繞澗梅花落
莫遣行人語笑高

雨中

梅雨朝仍暮蓮塘夏似秋水高侵樹脚屋漏滴人頭歇

畫厨烟出占晴礎汗收羣山思會面扶病一登樓

元夕

元宵有月便無愁已是新年第一籌說與素娥從此去
只須依樣做中秋

送薛子舒

南渡今何似中流欲濟船雖憑人擊楫要若水行川竹
木如山積桑田與海連吳宮猶可問白鳥暮推煙

海邑青龍鎮船官野鶴身誰知貴公子却是苦吟人二

陸多遺迹三高屬近隣
新篇因弔古時寄葛天民

次紫芝韻

欽羨私居好樓深夏必涼
小窓通遠岫古木蔽斜陽
露檻安花斛塵編滿竹牀
如君清到骨只合靜焚香

小亭

小亭終日對幽叢兀坐無言似定中
蒼蘚靜連湘竹紫
綠陰深映蜀葵紅
猫來戲捉穿花蝶
雀下偷銜卷葉蟲
斜照尚多高柳少
明年更欲種梧桐

上已呈嚴叟

時俗常談已斷霜雨寒翻著絮衣裳花枝照眼堂堂去
茗椀關心故故香楊柳稍傳鶯割據茆茨敢望燕商量
舊遊莫誦蘭亭語自覺中年易感傷

荷葉浦中

急雨捎荷分外奇珠璣狼籍錦紛披下塘六月關心處
西塞扁舟入手時却傍青蘆深處宿還思白石去年詩
平生浩蕩烟波趣月淡風微只自知

贈眇目道人說相

道人只具一隻眼
覷面全提格外機
塵裏神仙誰做得
歸來試舉問麻衣

戊辰夏五過抱朴巖

北窻隱隱透南薰
老子前身是此君
冷入魚腮池面雨
靜連禽語樹頭雲
苔因覓句行來破
石為觀空坐得溫
時事自多無耳聽
長安雖近不曾聞

元夕西陵橋觀月

年頭半月雪漫漫
養就姮娥玉一團
老子今宵奇絕處
西陵橋上獨凭闌

雨中郊外

暖氣先回宿草根
青青行可藉芳樽
未須著意催花柳
且為乾坤補燒痕

正月二日

小巷春陰獨掩扉
峭寒著盡過冬衣
老來情緒無多子
禁得梅花似雪飛

正月二十七雨中過蘇堤

一堤楊柳占春風
柳外羣山細雨中
人苦未晴渾不到
只宜老眼看空濛

清明日訪白石不值

花齋懸燈柳插簷
老懷那復似錫甜
畫船已載先生去
燕子無人自入簾

送劉僧善行

西望羣山碧
入吳故人一笠片雲俱
東風不斷村村柳

展盡陽關送客圖

湖堤晚步

照影憐寒水，關情祭夕陽。
雪天慳欠冷，年近日添長。
好句誰相寄，浮生各自忙。
有身聊頓放，無事可思量。

懷天竺礪梅

根在巖邊結，枝從水際橫。
此花殊近道，凡木欠修容。
雪籠幽片疎，篁倚瘦莖。
那時香不淺，憶我語無生。

柳下卽事

老柳中間野岸濱
水清常照樹邊身
白鷗黃鳥相忘久
來往如今不避人

睡少

睡少秋難曉
吟多食愈貧
南柯無近關
差盡夢中人

湖上新秋

十里荷風蓋盡傾
城中憶殺水邊清
催詩未用西湖雨
且送新涼入帝城

六月一日同姜白石泛湖

六月西湖帶雨山小舟終日傍鷗間風煙如許闌情甚
賓主相推下語難幾點送君歸大雅一涼今夜滿長安
江湖遠思知多少歸去風前冬倚闌

正月十二日夜姚江

斷岸春風峭空江夜雨清蕭疎篷上點彷彿葉間聲今
古雙眸冷乾坤一棹輕鬢從湖海白誰識謝郎情

雨中獨酌


平生寡合雖竭斗幾曾自飲一杯酒不因風月與湖山

更為松篁與花柳今夕何夕風雨來知儂渴肺生秋埃
麴生三緘忽自薦請為風雨聊一開老夫呼前呼未了
死生脫帽傾懷抱風雨橫斜入坐中賓主淋漓俱醉倒
須臾風止雨亦休主人送客凝雙眸葛天無懷不可狀
但覺兩耳風颼颼匆匆便是中秋節更與麴生替地說
此夜寧容著雜賓一尊只辨澆明月

水仙

玉潤金寒窈窕身翩翩翠袖挽青春水晶宮裏成仙女

香醉山中得道人
朔雪幾回埋不死
南洲一出淨無塵
朴翁老矣誰同調
相對無言意轉親



欽定四庫全書

兩宋名賢小集
卷二百八十五

二十一

兩宋名賢小集卷二百八十五

欽定四庫全書

集部

兩宋名賢小集卷二百八十六至

詳校官中書臣閔思毅

助教臣常循覆勘

總校官編修臣王燕緒

校對官助教臣汪錫魁

謄錄監生臣朱恩

欽定四庫全書

兩宋名賢小集卷二百八十六

宋 陳 思 編

元 陳世隆 補

轉庵集

潘檉字德久永嘉人諸父文饒文孝文禮俱登科
文饒字民則學本濂洛尤為多士所宗父虎右科
第一檉以父任補右職繼參戎幙召試為閤門舍

人久之授福建兵馬鈐轄卒平生喜為詩下筆立
成聲名藉甚人莫能儔永嘉言唐詩自桎始有轉
庵集

過舊有感

人間百寒暑正似須臾期當年同袍子一見雪滿頤不
惟形容變亦復聲音移坐定問姓字始省從師時見此
發咏嘆勞生果何為不如多飲酒滿腹同鴟夷

客舍

急雨鳴空壁輕寒上薄幃愁多空被酒夢短不成歸暗
想桃花落遙憐燕子飛偷兒欺客寢夜靜卷春衣

題釣臺

蟬冠未必似羊裘出處當時已熟籌但得諸公依日月
不妨老子卧林丘英雄陳迹千年在香火空山萬木秋
自笑黃塵吹鬢客愛來祠下繫孤舟

送友人游金陵

酒盡譚餘意轉新北風一舸下寒津遙知白下登樓處

正欠黃初着句人往事省來多歲月舊游疎似曉星辰
半山斜日荒涼寺更有殘碑待拂塵

簡徐判院

風誼凜凜昔未親正懸一榻待高人當年曾接東萊話
今日寧嫌北阮貧世味梅花開野水詩情馬首沒黃塵
何時載酒從君去靈鷲峯前借早春

出郭

酤酒三家市題詩十里塘薄雲鷗外影空翠馬頭香出

郭知無事尋僧有底忙終當成野逸小築近滄浪

歲莫懷舊

白髮將朱顏一去幾時返懷哉不能寐展轉復展轉雀
噪曉窗白雞鳴芳歲晚梅花眼中春故情千里遠

還自錢塘道中

江上青山落照邊江頭歸客木蘭船春鷗自共潮回去
一點飛來是柳綿

自滁陽回至烏衣鎮

行人元不恨長途下馬旗亭酒可沽回首瑯琊山不見
西風吹起豆田烏

鴈蕩道中

千丈巖頭一點紅春風吹落淺沙中山僧倚杖移時去
說似溪邊采藥翁

次韻酬陸放翁

瘦藤白苧岸烏紗隨分酬春領物華西崦三椽休問舍
南湖一帶近栽花眼昏客枕多儲菊肺渴僧庖屢借茶

無事閒門便早睡清燈喚起為吟家

雪上簡婁舜章

鷄頭旋煮蓮新拗簇鳳排花繪更鮮清夜故人情客到
小船載酒大船邊

平江道中

不載圖書載酒杯姑蘇臺下小徘徊東風不識人心老
擺柳吹花一併來

書姜夔昔遊詩後

我行半天下未能到瀟湘
君詩如畫圖歷歷記所嘗
起我遠遊興其如鬚毛霜
何以舒此懷轉軫移清商

兩宋名賢小集卷二百八十六